

SAVOGNIN: preschentaziun dall'Unìun TECUM

Dastgeir bandunar chest mond accompagnea

pi. Igl profil directiv dall'Unìun TECUM, ena organisaziun tgi accompagna muribunds sen lour davosa veia, è: «Nous ischans cò per vous. Igl de scu er la notg. A tgesa, an tgesa d'attempos u aint igl spital. Per pertutgias e confamigliars. Sainza costs. An uffezi d'onour. Cun attenziun.»

An collaboraziun cun l'Unìun da donnas Savognin ò Gaby Bonifazi, collaboratoura dall'organisaziun TECUM organiso ena seira d'infurmaziun. Tgi dat chell'uniun varon divers gio santia, pero mai gia da far ensatge cun ella. Gaby Bonifazi ò dastgea beneventar cun plascheir en grond domber donnas da tottas vigliadetnas a chella seira infurmativa. Siva digl sies bavegna surdat ella dalunga igl pled a sia «patruna», scu tgi ella dei.

Tge è TECUM?

Corina Carr, la magnagestiu dall'uniun ò preschento l'organisaziun. Igl terms principals dall'uniun èn gio menziunos ainten l'introduziun soura. L'uniun è neida fundada igl onn 2000, è politicamaintg neutrala e surconfessiunala. Ella è neida messa an peis antras sora Agnes Brogli, la superioura dalla clostra da Tgazzas e graztga alla fundaziun Menzi-Jenny-Gertrud. L'uniun sa cumpona dad accompagneders/dras voluntaris, dalla direcziun, dalla direcziun dall'acziun, dalla direcziun da scolaziun e dalla supranza. Ainten chels 16 onns d'existenza on passa 400 persungas savia neir accompagnedas sen lour davosa veia.

Fegnameira da TECUM è dad accompagnar carstgangs an taimps fitg difficils. Percheigl er igl nom dall'uniun TECUM, tgi è lategn e vot deir navot oter tgi «cun tè».



On gia plascheir tgi igl interess per las infurmaziuns e la discussiun è sto grond. (da san.) Ricarda Graf-Battaglia, Corina Carr e Gaby Bonifazi-Demarmels.

Scu è chegl tar nous?


Siva da tot chellas expectoraziuns, ò Corina Carr do igl pled allas preschaintas per far dumondas. Da chegl è betg nia fatg grond adiever, e Corina Carr ò percheigl intimo da forza piglier igl cor ainta mang e s'annunztgier per ena scolaziun per saveir accompagnar muribunds. Tar nous seian angal dus persungas tgi fetschan chegl. I seia er betg pussebel allas persungas d'accompognamaint da far lungs viadis per exaimpel siva d'ena notgpassentada dasper en letg d'en muribund.

Igl sarvetsch d'accompognamaint cumpeglia viglier da notg (Sitzwache), accompognamaint da de, regalar agl pertutgia taimp ed atenziun, ena collaboraziun strètga cun la Spitex u igl spital/tgesa d'attempos ed igls confamigliars pertutgias. TECUM less er pro-

mover tant scu pussebel a bleras persungas da dastgeir mureir a tgesa ainten chel ambiain tgi els on er vivia.

Siva tot chellas expectoraziuns è nia menziuno, tgi tar nous seia la mort forse betg en sch grond «tabu» scu ainten igls martgeas e lour aglomeraziuns. Tar nous seian igls confamigliars per solit chels tgi seian preschaints igls davos muments dalla veta. Er agl spital èg uscheia, tgi schi malsangs èn nias accompagneas ainten lour malsogna sur en pi curt u lung taimp, èn las tgrunzas er chellas tgi datan gugent er la tgrira duevla anfignen tar la davosa fladada. Per solit è chegl ansemen cun la famiglia digl pertutgia. Er ainten la tgesa d'attempos è chegl uscheia. Tgi adegna dapple gliout mora ainten instituziuns e betg ple a tgesa, è pero er tar nous en fatg. La gliout vign adegna pi viglia e cun la vigliadetna vignan er las difficultats da veiver sulets a tgesa. La tgesa d'attempos davainta igl «nov datgesa» ed er igli noua tgi la veta digl confamigliar vo a fegn. Tgi mintgign da nous less bandunar bagn accompagnea chest mond è en fatg, igl è pero er uscheia tgi chella persunga accompagnonta ò dad esser ena persunga da confidanza.

Pir siva tgi la seira d'orientaziun è stada concludeida uffizialmaintg, èn igls discurs ve dalle meas nias pi veivs. Chegl è er gist uscheia, duessan las preschaintas er dastgeir far adiever dalla pussebladad da barattar ideias. Lagn concluder cun en citat d'ena persunga voluntaria tgi fò accompognamaints: «Ia regal gugent en toc digl mies taimp da veta ad en carstgang malsang e muribund.»



Pi bod u pi tard ò mintgign dad eir chella veia.